

丁文誠公奏稿

丁文誠公奏稿

卷之四目錄

捻逼省門並撲黃防經勦奔竄東南摺

同治六年十月十二日

防黃兵單請 飭李鴻章籌辦片

同日

追捻獲勝察辦黃防摺

同治六年十月二十五日

行抵齊河赴下游確勘河防摺

同治六年十一月初一日

查明黃河北岸形勢分段守凍摺

同治六年十一月初十日

馬隊抵東分紮操練片

同日

籌議修約事宜摺

同治六年十一月十五日

密陳制夷方略片

同日

捻逆折回南竄扼擊布防摺

同治六年十一月二十一日

派員勦辦直梟片

同日

直梟東竄合勦獲勝片

同治六年十一月二十六日

捻逆回竄調軍進勦片

同日

捻逆被勦南遁照前分紮並查河牆摺

同治六年十二月初八日

直梟狂竄擬由東南扼勦片

同日

殲除直梟摺

同治六年十二月十三日

查驗河牆事竣並據報逆首生擒摺

同治六年十二月二十三日

殄滅馬賊地方肅清片

同日

東境肅清西捻竄豫籌防進勦摺

同治六年十二月二十六日

西捻漸向北竄督師進勦摺

同治七年正月初八日

捻竄順德督軍援勦並籌東省邊防摺

同治七年正月十一日

督師行過河間繞北截勦摺

同治七年正月十五日

督師行抵雄縣籲懇

陛見片

同日

捻蹤折向南竄督軍回勦兼顧東境摺

同治七年正月十八日

擒逼省門並撲黃防經勦奔竄東南摺

同治六年十月十二日

奏爲擒逆竄擾章邱逼近省門並撲犯黃防經兵勇分投堵擊省防黃防現經解嚴逆股由東南奔竄臣親赴章邱相機督勦仰祈

聖鑒事竊

臣

於本月初七日曾將擒逆折繞東竄臣派軍

分路追扼並親督常武一軍馳回省城攔截等情馳報在案惟時擒逆盤繞章邱以該縣屬之舊軍刁家莊及附近之周村等處民圩甚富環攻益急邊馬突過龍山距省城僅三四十里臣飭王成謙督帶所部常武十營於初九日黎明馳赴章邱勦辦而章邱以北齊東一帶亦有賊股蔓擾兇燄頗熾該處濱臨黃防最關緊要臣不得不暫駐省

城爲兩路兼顧之計惟兵力過單不敷分布當經飛飭副將莫組紳帶隊二百名馳赴齊東會同總兵張得魁一營嚴爲防範並飛調總兵趙三元督帶分駐碓口濟陽之礮船十隻由濟陽順流下駛協力堵禦又以賊勢全趨東北齊河以上黃防較鬆復飛調派防張秋之參將楊長林酌帶該處礮船下駛碓口以便調遣迭據探報初八日該逆由桑家莊率衆撲隄適莫組紳帶隊趕至見桑家莊一帶賊勢蜂擁而來悍匪數十名梟水搶渡隨波徐進並不溺沒莫組紳開放槍礮擊斃十數名該匪始由中流折回逆股旋退而齊東之桑家渡口有黃河決口一處又城東南十二里之賈鎮一帶水勢最爲平淺情形萬緊逆衆又奪

得逃難民船數隻駛入水套該處有民間小船百數十隻
及大鹽划十三隻均委棄內港該逆注意渡河急圖搶挽
聲稱欲將小船編排遙接兩岸徑渡莫組紳張得魁以該
逆搶船竄渡必由決口駛入卽飭勇丁於水深泥淖之中
乘夜砍伐樹木排列鹿角將決口搶築初九日卯刻趙三
元礮船駛至與莫組紳張得魁等晤商由北岸添雇民划
三十餘隻裝載陸隊隨同礮船過河乘賊不備槍礮齊施
斃賊數十名岸上各賊散亂卽時奪出小船百數十隻其
大船三隻中有百餘賊驚突登岸莫組紳等隨卽將船擊
破並將內港之船一概搶出打沈賊因船隻被我軍搶出
氣勢頓沮於初十日全數奔向東南一帶逃竄而桑家渡

葛家莊各處逆股亦退章邱一股王成謙一軍始過龍山
卽聞風奔竄各圩寨幸保全尙多王成謙派馬隊追至鄒
平探知賊已狂竄長山一帶似竄臨朐一路楊飛熊一軍
於初七日抵萊蕪臣令其探明道路出黑峪口徑赴章邱
與王成謙合隊惟該處險隘逼近逆氛未知曾否改道王
心安王正起二軍初七日行抵臨朐日內計可遇賊惟道
路隔絕尙未據有稟報現在省防河防已鬆臣馳赴章邱
並飛催楊飛熊與王成謙合隊略駐數日覘賊所向如賊
徑向東南則以王正起王心安兩軍跟勦而臣親督王成
謙楊飛熊由他道分路攔截如賊或回竄東北則臣督王
成謙等或追或扼總期力擊所有捻逆竄擾章邱逼近省

門並撲犯黃防現經解嚴臣親赴章邱相機督勦各情形
恭摺由驛具奏伏乞

皇太后

皇上聖鑒訓示謹

奏

防黃兵單請

飭李鴻章籌辦片

同治六年十月十二日

再臣查河防兵力本極單薄自濟陽以下陸隊祇有張得魁莫組紳二營水師則自張秋至濊口三百餘里祇有楊長林礮船三十餘隻自濊口至利津五百餘里祇有趙三元礮船四十隻餘則惟嚴飭各地方官調集民團協同守禦實以黃防八九百里此時賊股全在東境徵解日絀餽項不敷未能多募勇營其竭蹶情形本極可慮所恃水勢深闊可爲一綫之限臣復時時嚴飭各州縣將河中船隻一律提歸北岸不敢稍涉大意第黃河商船一聞賊警固已盡歸北岸濱黃州縣今秋各處皆有決口水勢平漫尋常汊港悉通大河而民地多被淹沒平時來往必須用小

船乘載此次賊匪猝至盡行委棄內港乃以逃難不及被其搶獲數隻幾至誤事仰託

聖主威福各將士均知竭誠用命設法將該船全數搶出一概打沈並拏獲奸細訊知各逆首意見不同尙未遂編船繫筏之計若使該逆兇計必行似非張得魁等水陸兵力所能堵扼臣雖極力調度幸得無事實亦出諸望外查黃防天險本爲可恃惟自濟陽以下水勢極屬平衍該逆馬匹過多但有官軍追逐或未必有必渡之志今倒守運西賊不得他竄必決意乘虛渡黃自在意中刻已嚴冬將屆堅冰合凍非節節有兵未易扼守臣前接准直隸督臣劉長佑咨稱黃河無年不凍凍必堅久今運河防軍除濟

甯下抵韓莊中間南陽等湖巡以師船不計外由沈口戴廟至濟甯僅二百餘里由韓莊至宿遷僅三百餘里已需豫鄂淮皖四大軍陸隊六七萬之衆始敷扼紮由宿遷清口以下另有湘淮兩部水師及漕浙諸軍聯絡布紮尙恐不足禦賊况黃流千里一經凍平更不如運河尙有坡坎隄牆可資憑扼若律以守運之法守之豈直省兵力所能布置等因到臣查劉長佑所稱各節原屬實在情形直軍任守黃防夏秋以來布置自爲可恃現經馬賊滋擾防軍節次調回留防齊河一帶已屬無多瞬屆冬凍必不能以萬難全顧之勢責之直軍運東近遭蹂躪臣軍非力籌追勦無以對八府州之士民且黃防縣臣卽使將全軍坐

守東河直隸亦以全力盡駐河干以運防情形較之豈敷
布置黃河自張秋穿運經東昌武定入海上年扼守運東
自濮范以至張秋僅二百餘里直東兩軍分任之其自張
秋以下皆可守今倒守運西自張秋以至利津多至八
百餘里臣與劉長佑萬不能有此守兵冬凍以後該逆南
迫運岸必北突黃防此乃必至之勢各軍扼守運河本欲
以東省爲壑使賊不得旁趨然守運而不守黃是驅賊北
竄使河北決裂

畿輔震驚豈爲得計臣於七月二十九日曾將運河防軍
有礙黃防情形附片陳奏在案李鴻章初辦運防時臣亦
婉商以爲非策及在沂州相晤臣又面言旣辦運防則黃

河冬防決不易籌李鴻章亦私憂竊歎不知所以爲計今冬凍在卽賊勢又非計日可滅河北重地極爲可虞現在賊全注東境以東省之兵力而論其勢能勦而不能防且與賊共處一方東省河南岸之地數倍於北岸卽防亦萬難得計應請

旨飭下李鴻章再行熟察運黃情形妥議籌辦實於黃防有裨臣爲

畿輔大局起見謹附片陳奏伏乞

聖鑒訓示謹

奏

追擒獲勝察辦黃防摺

同治六年十月二十五日

奏爲官軍追勦接仗獲勝賊股向東南奔竄

臣

親督常武

吉勝兩軍繞出泗水向西路攔截現飭探蹤迎勦

臣

親赴

齊河下游察辦黃防恭摺具奏仰祈

聖鑒事竊

臣

於本月十二日曾將擒逆撲犯黃防經防軍

堵擊逆股敗竄並省防亦經解嚴

臣

親赴章邱相機督勦

等情馳報在案惟時王心安王正起兩軍由沂水進追初

九日行抵金嶺鎮探知賊在章邱一帶帶隊迅進王心安

於初十日卯刻行抵張店見馬賊四五千騎由東南奔突

王心安揮軍追逐小有擒斬該匪繞由四寶山全向東北

折竄王正起王心安跟蹤緊追賊竄至臨淄十四日申刻

追及於壽光境之丹河時賊正欲駐紮王心安整隊急擊殺賊二百餘名奪獲器械甚多賊勢不支連夜撲渡丹河向濰縣一路狂奔十五日四更王正起由東北進追緊接賊後甫過濰河該逆四面兜撲王正起整隊力戰六七十里且戰且前計斬賊五六百名賊勒騎猛撲王正起督同營官王學禮等直前接戰殪其衝鋒前騎二十八匹賊勢稍卻旋又猛衝步賊四五千名由東南虜至營官張福興等以四營接應馬賊旋繞圍逼張福興身中數矛幸僅透裏衣該弁手刃三賊奮死力戰各勇丁施放槍礮該逆倒斃甚多立即敗退計斃賊三百八十餘名王心安由西北一路追進適遇敗匪卽列隊迎擊賊勢大靡追殺二十餘

里計斃賊四五百名營官宋延德見賊繞後路獨以一營回擊直前力戰斃賊約百餘人賊卽敗退王心安王正起合隊緊追至濰縣城外又遇大股賊匪鏖戰三時殺賊四百餘名救出難民七八百名王正起等追出十餘里賊股全向東南敗竄又斬斃七十餘名王正起生擒長髮捻逆十八名賊酋一名奪獲賊馬二百餘匹王心安生擒髮捻二十一名奪獲驟馬一百五十餘匹刀矛旗幟共四百餘件是日該軍等力戰七八十里向晚始行收隊查點陣亡勇丁三十四人受傷八十餘人營哨各弁均無損折十六日早仍卽嚴軍追逐臣查王心安王正起兩軍僅一萬人追賊已五十餘日日行百餘里一息不停飢疲過甚臣以

賊勢過衆時深系念且其營中寒衣沿途解送輾轉折繞皆未能解到饗項亦多欠缺而每次遇賊士氣俱奮此次緊接賊後連戰皆捷且使該逆一刻未能喘息各屬大小圩寨均一律保全尙爲出力該軍等十六日後尙無稟報連日跟追計可迭有戰事據各州縣十九日稟賊股全向諸城之巴山一帶望東南狂竄臣於十二日到章邱時始擬督飭楊飛熊王成謙兩軍馳赴青州相機勦辦惟時賊勢全向東南臨朐一帶有邊馬已到諸城莒州之信適王心安等由南路趕到又折回東北臨淄一帶若臣軍再事跟追已出王正起等軍之後勢已無及時劉銘傳一軍又於初十日由沂州進兵東路兵勢已厚計賊勢似必南趨

諸莒竄擾西路臣軍尾追落後必遠而西路竟無一旅殊
深焦慮因嚴飭王心安王正起兩軍盡力窮追期於逼賊
南竄以免黃防之慮臣親督王成謙楊飛熊兩軍馳回泰
安以遏西路聞潘鼎新一軍已由新泰南下臣卽取道泗
水兼顧兗沂據日內探報有賊股由莒州竄向青口之信
臣料賊如不出青口必由沂州上竄臣現飭楊飛熊等探
明迎擊亦以逼之南竄使西路黃防不至喫重現在冬凍
將屆前奉

諭旨飭令李鴻章籌議覆奏實深欽感刻經遇賊運東處
處有黃防之患東省祇此二萬人跟追攔截實已無可分
撥想李鴻章當必妥籌布置刻下情勢日迫臣追勦之餘

回顧黃防焦灼萬狀現擬於二十七日馳由省城濠口起至利津一帶周履河道形勢並調集濱黃各府州縣會商一切辦法以俟李鴻章奏明如何布置即便會同協力辦理至此間勦賊事宜臣所部楊飛熊王成謙等尙知緩急且亦實心可靠已諄飭其相機辦理尙不致於貽誤臣查勘河道約計半月後即可回營所有王正起等軍追勦獲勝及臣親督常武各軍繞道攔截並擬親赴黃防查勘防務各事宜謹恭摺由驛具陳伏乞

皇太后

皇上聖鑒訓示謹

奏

行抵齊河赴下游確勘河防摺

同治六年十一月朔一日

奏爲捻逆受創南竄勢趨江境

臣現行抵齊河卽赴下游

確勘黃防恭摺仰祈

聖鑒事竊

臣於上月二十五日已將官軍追勦獲勝及

擬赴齊河下游查勘黃防各緣由馳報在案茲據王心安王正起稟報十五日在濰縣接仗後晚間探知賊去未遠四鼓後往襲賊營未能深入十六日黎明出隊至七里廟一帶突見悍匪四五千騎欲抄出官軍後路王正起王心安各派四營在七里廟嚴紮王正起自以六營結爲方陣四面策應王心安親督營官金成德等將隊伍結爲七起轉戰而進直衝賊騎轟斃數十名賊股亦分爲七八起猛

衝狂繞爲王正起方陣所阻不得逞志因撲向七里廟旁
經廟前八營將槍礮環擊王心安與營官宋延德直前衝
殺賊騎大卻步賊七八千人自東南大至王正起以六營
擊之陣斬甚多步賊亦敗該逆見我軍三面兜擊馬賊皆
擁步賊向南疾竄王正起王心安合隊力追二十餘里賊
股盡向佛山寨一帶竄去共計轟殺賊匪約一千三四百
名生擒悍匪六十餘名解釋髮脅三百餘名奪獲騾馬一
百七十餘匹賊股前隊十六日早已抵安邱城外是日敗
匪全撲安邱適劉銘傳一軍由穆陵關進十七日未刻到
安邱城外奮擊獲捷斬賊亦多該匪迭經傷挫全向諸城
一路竄去夜間不敢放火奔突甚速王正起王心安於二

十日追至諸城二十一日黎明卽跟追南下劉銘傳亦已
由諸城疾進據日照莒州二十一日稟報該匪已抵日照
勢向南趨頃據探報賊前隊已抵青口各軍隨後緊追揣
度賊勢計已盡趨江境現在淮軍劉銘傳潘鼎新等軍盡
已出勦臣軍跟追五十餘日極形疲乏江境與東境界連
數縣如賊出東境後擬令王心安一軍紮李家莊王正起
一軍紮沂州府城外截其回竄二軍互爲聯絡賊至則擊
王成謙一軍移紮兗州楊飛熊一軍令其暫紮泗水如賊
有西竄之信或合隊迎擊或趨顧泰安令其臨時覘賊所
向妥爲進止臣現行抵齊河卽乘船駛赴下游查視黃防
並調集各州縣會商一切約半月可畢黃防關係大局而

河段過長冬凍實無把握非臣棉力所能獨辦而責無可辭亦不能不竭蹶辦理容俟查明後再將一切情形由驛奏報仍一面咨請李鴻章劉長佑崇厚等會令辦理庶收通力合作之效所有捻逆受創勢竄江境臣馳赴齊河查勘黃防各情恭摺具陳伏乞

皇太后

皇上聖鑒訓示謹

奏

查明黃河北岸形勢分段守凍摺

同治六年十一月初十日

奏爲查明黃河北岸形勢擬籌商分段守凍以防北竄而固

畿疆恭摺仰祈

聖鑒事竊

臣

於初一日將官軍追勦續勝賊盡南趨現將

東軍分路扼截及由商河至利津查勘河防各緣由馳報在案查黃河自曹州府荷澤縣境入東由張秋穿運歷泰安濟甯武定各屬入海上下一千數百里自濮范以下至齊河

臣

行經兩次形勢尙能周知自齊河下至利津從未

親歷初二日由齊河乘船順赴下游逐細查勘並委員丈量道里計自齊河至海口共五百七十五里齊河以上至

張秋計二百八十里通計自張秋起下至海口共八百五十里河道極爲縣長本年八月後水勢漲發異常爲歷來所僅見自十月初九日起始見消落至今二十餘日內計已消至一丈七八尺有餘查閱現在河身寬約四十餘丈窄處僅二三十丈臣復詳詢土人均稱冬至前後水勢尤落至寬不過三十餘丈窄處僅二十丈十餘丈不等至於河冰凍結則在冬至後三十餘日之內或全河俱凍或彼此間凍歷年情形不一難以預定凍合之後人馬俱可通行等語然天時不可得知以目前情勢而論賊蹤奔竄運防嚴密黃河實爲急務惟本年河防與前數年迥異從前賊在運西所有自濮范起至張秋止不過二百數十里應

須設防自張秋以下皆以運河爲限無庸議守今賊在運東則自張秋以上自可不防自張秋以下至海口河冰一結在在可慮自不能不節節嚴防以杜竄越惟東省賊在腹地勦事爲急兵力難分臣於查勘之餘隨調集沿河各府州縣商同議辦飭令各按地界勸諭民團挨段助守各州縣尙知踴躍但本年濱河地方被淹甚重刻下災黎徧野若僅恃團防恐難得力非協之以兵不可現在東軍在防之營除張秋一帶水陸不計外自齊河至利津陸路僅莫組紳張得魁兩營水路僅趙三元礮船三十餘隻爲數過單本年閩省大半被兵被水錢糧減色庫款支絀萬狀斷難再行募勇卽以臣所帶勦兵僅二萬人以之追勦攔

截於八府州之地賊衆地廣已屬分布不開勢難多撥協
守且查東省從前河防僅二百數十里已合直東兩省兵
力始克分布今改守八百數十里非惟東省力有不及卽
合之直省兵力籌辦亦屬萬難

臣

日前迭次欽奉

諭旨飭令李鴻章劉長佑崇厚妥議籌辦仰見

聖明洞鑒莫名欽服當此防勦萬緊之時李鴻章籌辦運
防自必注念黃防直隸現有防軍在境崇厚亦素顧大局
上年及本年均係彼此兼顧不遺餘力

臣

刻惟有欽遵

諭旨與李鴻章等實力籌議以期衆擎易舉查直隸防黃
各軍現在駐守張秋齊河一帶張秋與運河沈口緊接李
鴻章現守運河應請就近酌撥勇營協助崇厚派來防軍

現尙未到或守齊河以上與直軍協力或守利津一帶與東軍協力應由崇厚酌定自齊河以下至海口五百餘里由臣籌撥兵勇聯絡民團設法固守此係萬不得已之計北岸一面籌防仍乞

聖恩通飭各營勦兵務在南岸猛力追逐賊至何處勦兵卽行趨顧使沿河上下不至喫重臣現將新到馬隊調集分布河北以操爲防並就所部勦兵內酌撥十數營渡河迅速辦理現值冬凍在卽防務萬不宜遲茲謹將全河地勢繪圖貼說恭呈

御覽仰懇

天恩迅飭李鴻章等妥爲籌議臣亦一面飛咨商辦以重

河防而固

畿輔實於大局有裨再臣於初四日查至蒲臺距利津僅六七十里據該縣面稱以下水勢與上游無異惟由利津陸路折回汙泥難行臣因急於回營督勦恐有稽延當派充沂道文彬前往查勘卽於初五日由蒲臺陸行折回初六日抵齊東卽據王正起等來稟賊於二十八九等日在江境羽山一帶盤踞意欲竄擾沂州因該軍駐紮沂境之店頭李莊一帶正可迎勦卽於初二日回竄東境沿海之夾倉口濤雒日照一帶並探稱邊馬已竄近諸城據獲逃賊均供該逆仍欲由青州竄鄒平章邱濟南一路窺伺竄運王正起王心安兩軍已於初四日五鼓由沂拔隊向

莒州一路探明追勦王成謙一軍亦擬取道穆陵關一路繞截臣查現在江境兵力過厚臣軍日前駐沂亦緊扼其西竄要路該逆無計可逞其欲竄由青州章邱濟南一路搶運自屬必然之勢臣於得信後卽飛調楊飛熊一軍定限初十日到省臣於初九日回經省城卽擬暫駐催提該軍一到卽於十一日親督由章邱一路迎頭攔截惟黃河各防臣必須撥兵協守而刻下王正起王心安王成謙三軍均在前敵或追或截未能遽調楊飛熊一軍旣經探賊有竄章邱濟南之信臣必得一往截勦以遏狂氛河防之兵一時尙難分撥臣俟勦局一定卽行酌派決不至失時誤機所有查明黃河北岸形勢預籌分守及現在布置追

截各情形理合由驛具奏伏乞

皇太后

皇上聖鑒訓示謹

奏

馬隊抵東分紮操練片

同治六年十一月初十日

再臣前奏准招募東三省壯丁係吉林黑龍江兩處分辦
臣前駐軍沂郡據報吉林西丹一千六百五十名行抵東
境業經調令赴沂親加點驗均尙樸實亦並無內地流民
夾雜混充惟人雖到齊而馬因由黑龍江購買至今尙未
能到臣當派沂州府知府長賡會同原派統帶官先將該
丹丁教演槍法操練長矛俟馬到之日再行教令乘騎演
陣以免延擱嗣於十月內接委員張蔭桓稟報招募黑龍
江西丹一千六百五十名均各帶馬匹已於十月內陸續
全抵東境惟山湖兩路俱被黃水淹阻人馬萬難行走臣
當飭令該丹丁等卽在東昌府各屬暫時分起駐紮一面

派員前往點驗據報此起丹丁較之吉林尤爲精實可靠
臣查該丹丁等由東三省來跋涉數千里未免疲乏自不
得不暫令休息卽其馬匹初到內地水土不服亦須加意
喂養且該丹丁等均係來自田間一切槍箭陣法尤宜詳
加操練方期得用當茲勦擒喫緊之際臣之步隊與賊角
逐每戰卽能用力第追殺不及賊騎馬隊在所急需然未
練之衆亦不敢輕於一試必俟訓練三四月後俾各丹丁
技藝陣法皆能純熟馬匹亦俱臚壯始令隨同現在步隊
相機攻勦使之不至於敗久則漸成勁旅可以備緩急之
需現今所派統領營哨各員弁均係富明阿等原派之員
黑龍江尙未接見吉林一起已與談論數次其中似多有

積習過深之員臣當隨時認真稽查如稍不得力卽行奏
換不令其濫廁戎行致壞始基至各丹丁等如有不遵約
束之徒務懇

天恩准臣隨時按照軍法懲辦再行奏咨庶幾軍律森嚴
該丹丁益知警惕於操練實有裨益所有吉江丹丁先後
到東並現在分駐操練各緣由謹附片具陳伏乞

聖鑒訓示謹

奏

籌議修約事宜摺

同治六年十一月十五日

奏爲籌議洋人修約事宜遵

旨密覆恭摺仰祈

聖鑒事竊

臣

欽奉

密諭飭將洋人修約事宜通盤籌畫詳細覆奏並准總理各國事務衙門密函備具條說囑將各事宜妥議奏覆

臣

查夷務之興已數十年議戰議和迄無成效咸豐十年事起倉卒以互換和約稍紓禍患然自定約以來該夷輒於條約外別生枝節復經總理衙門王大臣等遇事密慎據理堅拒迄未得逞辦理極爲不易來歲換約之期勢必要索多端妄意挾制今日處極難之勢自不可輕啟事端然

察其要求各節其爲害過重者亦必無可計之理卽如計
覲一事查和議既定卽准該國使入

見亦兩國通好常事惟今日時勢稍有不同彼旣不行中
國之禮其桀驁之氣自難遽馴名義之間關係甚重若
天威咫尺該使等於

殿廷之上偶形疏失豈容置之不問若遽加詰責又恐反
致紛紜各國貪嗜無厭向來小不逞意輒向總理衙門嘵
嘵爭執若准入

覲恐將來錐刀之事動煩

睿鑒措置較難凡此皆易啟爭端似不如先爲婉拒方今
皇太后垂簾聽政於各國使臣自難

召見而該夷動欲以客禮自居更屬難於

召對似可以此意婉言拒之未容輕許以杜其漸也至如遣使一事兩國和好通使往來原屬可行現經總理衙門奏派美國公使蒲安臣隨同揀派章京志剛孫家穀出使將來各國情事我既可以詳加體察而因此投閒抵隙能潛使各國自爲離異者權衡卽在其中此事深中要害辦理自爲妥洽此次係屬試辦一年期滿之後或須另行派員似可

飭中外各舉所知必操守清潔膽識並優者方得入選送歸總理衙門揀派至此項費用目前試辦後可以略知其數日後或由各海關籌款備用此事有利無害患在難得

其人若任使得人於中國實爲有益又如開拓傳教庚申條約已載此事此時更難更易且查各省傳教雖不無紛擾然民間苟知習教之非卽夷人亦難強人以必信故每遇有事尙易了結但地方官能公正不偏其氣亦可稍阻惟有通飭各督撫於凡有洋人傳教處所飭屬隨時加意於地方明白紳耆密爲開導彼此能曉諭鄉民互相禁止民間若相禁戒傳教之術亦窮第恐有奸黨匿迹其中全在地方官持正守法亦易辦理至此外如有該夷教徒滋事地方官力所不能辦者各督撫相與提挈之必能少有補救至若銅綫鐵路內地設行棧內河駛輪船販鹽挖煤等事臣將條說所開悉心詳審總理衙門於受害處洞悉

靡遺其所以拒彼之言詞正理長無可再易此事爲害過大使我之

國計民生日耗月削於冥冥之中不堪設想臣百計思維其爲

國家所必不能許者理勢灼然無待遷就卽或稍爲遷就而各處民人亦必負忿啟爭於和局終屬無裨至於無裨和局之時該夷仍欲我箝制民人而民人愈不服甚且相與輕而玩之且生他變斯尤害之最大者也惟洋人注意於此數事尤爲專重此時該夷志驕氣滿非可以情喻理遣也明年換約之期彼必以此首先爭執爭執不從必相脅制脅制不行必形決裂臣愚謂此時先事綢繆實屬無

可再緩必來歲換約據理執辯彼雖過求無厭我總婉與
商量必不使決裂之端自我而開而根本之至計應請迅
速

密飭各省預爲籌備不至臨事倉皇如該夷將有決裂之
形務令一呼卽至而臣尤所慮者現在夷人盤踞

京師萬一事將決裂其臨機應變關係安危之機閒不容
髮臣愚以爲先事則密以圖之臨事且柔以示之俟我布
置密定務期先發制人自處於有備而乘其所不備乃爲
有濟至於此事之發以機關貴捷呼應貴靈爲要著然此
尤須專責之於近

畿數省令其先事認定不准推諉若求之於遠恐難應手

且慮洩機要之值此時事惟期內外一體互爲聯絡臂指相使庶幾仰賴

聖主威福或可以弭意外之變臣知識樛昧東省與各國交涉事件較他省尙簡臣於各國事務亦未盡諳習茲惟就理勢細爲酌度總宜堅持定計不遂貪求不與啟釁而半年以內速行預備似爲切要敬抒管見謹恭摺由驛覆陳伏乞

皇太后

皇上聖鑒訓示謹

奏

密陳制夷方略片

同治六年十一月十五日

再洋人盤踞京城已成心腹隱患近日妄意要求略無忌憚實由於此卽我之辦理夷務動形牽掣者亦由於此此後棘手情形日甚一日臣揣該夷之心以爲我根本重地與我雜處無事則藉爲要挾之具設使有事而

宮闕所在雖有強兵健將亦將有所顧忌而不敢發上年復於

西華門側建造洋樓聞經總理衙門斥辯始行折低臣每詢之都人均謂尙可視遠此其處心積慮殆欲因我所忌以挾我乃有所恃而不恐用意誠狡而爲計彌毒來歲修約之期該夷要求不遂恐將恃此爲挾制之端若不思奪

其所恃則不能以伐彼之謀亦不得以伸我之威臣愚以
爲將來事機萬一有變應請於先事之時

密召二三眞能知兵之督撫相與密籌定局卽責成以護
衛

宮廷之事務在不動聲色發於夷人所不及料但能應變
一時使

朝廷不致震驚則可以乘勢驅之使出而夷人失其所恃
亦將氣沮迨其氣沮而就我乃可因其勢而徐籌駕馭之
術惟此事關係極大若果事勢至此

特召之軍不惟擇將並責擇兵未可輕爲調取臣每細訪
求各路軍營情形惟陝西老湘營一軍根柢甚好毫無夾

雜頗屬節制之師此外或好或否尙須精選

聖明自有權衡臣在東省切近

畿輔亦必審之又審預籌一二可靠之軍以備急用斷不

敢稍涉粉飾至與洋人用兵之道水陸各異臣未習水戰

未敢臆說至於陸戰臣竊謂夷人有勝我者三有不及我

者三如火器精良遠勝於我而其施放之便捷則實不及

我心志堅忍遠勝於我而其步伐之衝突則實不及我槍

礮轟炸遠勝於我而其刀矛之擊刺則實不及我以其所

不及我者而設法以敵其勝我者固未必全操勝算亦何

至毫無把握且夷人所恃在槍礮此宜於攻奪營寨若與

之易營陣爲野戰則槍礮不盡得利矣夷人所重在隊伍

此利於列陣交鋒若與之易整隊爲散擊則隊伍亦不盡得利矣至若大江之中夷人輪船洵爲利器然東南水師必有能設計以敵之者應請

密飭妥議以爲預籌之計臣才疏識陋深愧言之無當事機惟處此時勢萬難拳拳愚衷如赤子之依戀父母實有不忍遽言而又不敢不言者謹據愚見披瀝密陳伏乞聖鑒訓示謹

奏

擒逆折回南竄扼擊布防摺

同治六年十一月二十一日

奏爲賊被官軍堵剿折回南竄現將各軍分路扼紮以備迎擊並籌布黃防恭摺仰祈

聖鑒事竊

臣

於本月初十日將查明黃河北岸形勢會籌

分防及賊蹤回竄東北

臣

督軍迎剿各緣由馳陳在案十

一日探報賊於初八九日竄赴安邱適所調楊飛熊之軍

亦到

臣

卽於十二日督飭由章邱前進十三日接據王成

謙稟報賊於十一日由安邱竄入濰縣劉銘傳及王正起

王心安各軍亦於是日到濰截剿該軍於十二日行抵青

州已繞出賊前定於十三日由臨淄一路迎截等語十四

日

臣

飭楊飛熊一軍由章邱進至鄒平復接王成謙王正

起等及壽濰各縣稟報賊於十二日竄渡濰河經劉銘傳等軍於半渡截勦獲勝斃賊千餘名奪獲馬匹數百王正起等軍於濰縣東北勦擊殺賊亦多賊敗竄壽光勢由臨淄一路西竄等語臣以賊走壽光王成謙一軍於十三日由青州馳往臨淄正可迎前截勦詎該逆見西路有兵攔截不敢西行仍復折回濰縣十五六七等日探報已由濰縣疾奔安邱柞山向日照一帶南竄已及江境各軍均隨後緊追等語竊以賊蹤極爲飄忽現雖南竄仍必折回將來非由西北竄兗州泰濟必由東北竄沂州青濟刻下追兵約計五萬餘人力量甚厚運防之兵亦爲嚴密計此時賊勢注在狂奔以避兵則兵勢自應注在攔截方期處處

應手臣現將王正起王心安楊飛熊三軍分作東西迎截之師以王正起一軍紮青州王心安一軍紮金嶺鎮如賊再由莒日東竄青萊則青州金嶺鎮距臨淄安邱壽光昌樂濰縣淄川長山縱橫均不出百里二百里之外隨處皆可攔擊且可以扼賊由東北樂安博興高苑一面趨撲黃防之路以楊飛熊一軍紮固山若賊由泰安西竄濟南則固山距長清齊河均不過數十里隨處皆可攔截且可以扼賊由齊河濰口一面趨撲黃防省防之路兼以兩路分紮一東一西相爲犄角若賊竄西南金嶺鎮兩軍卽可由東而西策應西路似此東軍迎勦淮軍尾追庶可處處遇賊不致轉折落空而隨地亦可兼顧黃河以勦爲防於河

防不至坐困局勢似較靈活至河北地段過長不可無兵駐守臣已飭王成謙一軍渡河由惠民縣屬姚家渡起至海口止二百七十餘里會同楊長林礮船四十餘隻及黑龍江馬隊一千六百餘名分段駐防其姚家渡以上至齊河大橋止三百餘里已調前駐防張秋之東昌營兵三百名並另調青州滿營兵五百名交張得魁管帶會同莫組紳勇營趙三元礮船三十餘隻及吉林馬隊一千六百餘名分段駐防並嚴飭各州縣督勸民團協同兵勇趕築河牆捐蓋窩棚以資憑守惟河防自鐵門關至海口四十餘里海風凜冽寂無居人食物柴薪無從購買又係潮汛來往搭蓋窩棚更難擇地三風勁地寒尤易結凍此地極爲

緊要現飭文彬設法

辦臣仍擬暫駐章邱調度一切所

有追賊南竄現將各軍分布勦防情形謹恭摺由驛具奏
伏乞

皇太后

皇上聖鑒訓示謹

奏

派員勦辦直梟片

同治六年十一月二十一日

再正繕摺間接據海豐陽信等縣及武定營迭次飛稟直省現有騎馬賊匪勾結鹽梟馬步共有千餘人由直隸南來現已竄至慶雲縣屬之崔家口勢甚猖獗本月十五日圍攻慶雲屬之黃家屯莊並探聞鹽山縣城有失陷之信又據陽信縣稟稱該匪已由楊家橋竄過老黃河南岸距海豐僅十餘里該縣僅三十里刻已嚴密防堵並據德平縣周士瀚稟報有大股馬梟由直隸滄州薛家灣過河自滄州南五十里之騰口往舊州奔竄匪衆約有四五百人馬六七百匹又聞滄州之羊三木一帶亦起有鹽幫約五六百人勢欲向東滋擾請派兵防勦等情查直省前起馬

賊屢經勦擊尙未盡殲此股賊眾是否前起馬賊紛竄句
擾抑係另股起事尙未可定臣於接報後卽飛飭派赴黃
防之王成謙就近分帶勇隊前往海豐一帶速爲勦辦並
飭張得魁莫組紳等一體嚴密兜勦惟河防現在籌辦守
凍甚屬喫緊茲慶雲滄州海豐等處又有馬賊梟匪句合
肆竄該處切近黃河北岸既有匪蹤恐成腹背受敵之勢
防務益形棘手現已嚴檄沿河北岸各防營認真確探嚴
防並飛咨湖廣督臣李鴻章直隸督臣官文三口通商大
臣臣崇厚查照辦理謹附片陳奏伏乞

聖鑒訓示謹

奏

直臬東竄合勦獲勝片

同治六年十一月二十六日

奏爲直臬竄入東境官軍民團合勦獲勝殲斃極多餘匪
敗回直境現飭趕辦河防恭摺仰祈

聖鑒事竊

臣

本月二十一日將直省馬賊句合臬匪由直

屬鹽山慶雲竄入東境海陽各縣河防喫緊飛調兵勇迅
卽勦辦各緣由附片具陳在案二十四五等日連接署武
定府知府張鼎輔防河副將莫組紳暨海豐陽信各縣稟
報賊於十六日由慶雲縣屬老黃河南岸竄入海豐境之
北營樂善堆滋擾約有一千餘人多係馬賊該縣知縣劉
輅一面請兵勦辦卽會督營勇紳團馳往堵勦北營團眾
亦從旁繞出匪眾施放槍礮拒敵團勇直前接戰斃賊二

十餘人生擒三名奪獲馬匹器械多件匪眾敗竄西北繞及海豐縣城十二里及離城八里之范家莊該縣及把總李成德復督團勇追勦斃賊目二名奪馬十餘匹該匪敗竄大莊等處屯住十七日該匪復折由范莊南趨直逼海豐城圍兵勇紳團分隊迎擊匪眾馳馬抗拒團勇奮力攻勦殺賊十餘人奪馬數匹賊復敗退范莊勇團隨後跟追時陽信縣知縣徐家杰亦會督該縣兵勇紳團前來會勦該匪列隊抗拒我軍施放槍礮轟擊約戰四時之久斃賊二百餘人奪獲馬匹器械多件匪眾正在敗退適直隸帶兵之總兵陳濟清余承恩等督帶馬隊趕至迎頭截住勇團復會合首尾夾擊該匪在馬上開放洋槍拚死抗拒我

軍馬隊亦用槍礮連環攻擊又斃匪二百餘名匪勢散亂直軍勇團分路衝殺斃賊甚多該匪勢不能支捨命奪路向西北趙王河奔竄直軍暨勇團隨後追及又斃賊數十名僅餘敗匪二三百人梟水過河策馬疾馳勇團追至慶雲屬之棗園橋駐紮直軍跟蹤緊追十八日該匪直向鹽山滄州迤北狂奔直軍分兩路跟追等語臣又於本日接據德州恩縣各處稟報該匪於二十一日已由直境吳橋一帶竄近德州北廠經參將黃兆昇堵剿殺賊數名生擒二名該匪不敢停蹤奔向恩縣復經該縣帶勇經歷朱雲欽迎頭截擊又殺賊十數名該匪直向南奔黃兆昇跟蹤追剿臣已飛飭龔易圖及傅振邦等迅速派隊馳往會合

迎擊查此股賊衆據探卽係前起馬賊由滄州一帶句合鹽匪十五日竄入慶雲鹽山十六日卽突至海豐陽信日馳百數十里勢甚剽疾臣二十一日接到各該縣稟報當以海陽各縣切近黃河北岸值此河防喫緊之際兵勇民團甫經趕辦牆工而匪蹤忽來全行掣動若使日久蔓延轉瞬冰凍設擒從南岸窺伺防勇腹背受敵大局不堪設想當卽飛飭各該縣集團嚴防一面飛飭王成謙及在防各營撥帶兵勇星馳勦辦其時莫組紳於十七日聞警已先帶隊往勦未及趕至而海豐陽信各縣卽能會督營勇紳團節節截勦斃賊甚多嗣官軍追至又復會合夾擊將該匪殲除大半餘賊敗竄出境河防藉可無慮辦理尙爲

迅速未便沒其微勞相應籲懇

天恩俯准將署海豐縣知縣劉輅俟補缺後以同知直隸州知州用先換頂戴知州銜陽信縣知縣徐家杰

賞加運同銜海豐汛把總李成德免補千總以守備用以示獎勵至各該縣紳團深明大義奮力殺賊又助官軍力勦當此借資民力之時自應量加鼓勵可否准臣查明實在出力紳民酌量保獎之處出自

逾格鴻施其餘各縣傷亡紳團容詳查分別撫卹至賊已出境各勇團現因河防緊要臣已飭調回防迅辦修牆搭棚各事未便令其越勦致誤防局所有直隸入境經官軍民團合勦獲勝敗竄出境及現辦河防各情形謹恭摺馳

陳伏乞

皇太后

皇上聖鑒訓示謹

奏

捻逆回竄調軍進剿片

同治六年十一月二十六日

再前據各路稟報捻逆被剿南竄

臣

以後路追兵甚多奏

將王正起王心安兩軍分紮青州金嶺鎮兩處專備迎剿

並可屏蔽黃防於二十一日馳陳在案

臣

拜摺後卽專弁

持令向前敵飛調惟該二軍自濰縣截擊獲勝賊蹤由東

南奔竄卽與劉銘傳各軍分道由安邱諸城一帶緊追相

距較遠刻尙未據報到本日接安邱高密等處探報賊又

有由青口夾倉等處回竄安邱高密之信該二軍已由西

路臨朐青州一路繞出抄截等語查

臣

前擬令該二軍駐

紮青州金嶺鎮正爲賊回竄東北隨處可以迎截起見本

非欲其株守待賊茲賊旣回竄該軍折從西北抄截適與

駐紮青州金嶺鎮之意合臣已飛飭其如賊趨高密昌邑
濰縣一路卽繞從壽光臨淄截擊如經追勦南竄卽折回
紮青州等處預備迎勦該軍必能遵辦臣現仍駐鄒平與
前敵爲近調度尙捷楊飛熊一軍刻令暫駐龍山以扼西
路如賊被擊西來正可迎頭截勦容有捷報再行馳奏謹
附片具陳伏乞

聖鑒訓示謹

奏

捻逆被勦南遁照前分紮並查河牆摺

同治六年十月初八日

奏爲捻逆復被官軍兜勦南遁現仍照前分紮准備回勦並親往查驗河牆以期嚴密而重黃防恭摺仰祈

聖鑒事竊

臣

於十一月二十六日將捻逆復由南路折竄

東北高安各情附片具陳在案是日夜丑刻接各路探報二十五日賊由安邱小路欲趨穆陵關偷竄沂莒適王正起王心安兩軍正由穆陵關回截而來該逆聞知有兵連夜折由昌樂向臨淄淄河店一路狂奔勢欲西竄章邱濟南一路撲運二十七日據探報及新城長山各縣稟稱賊已竄及新城之張店邊馬擾至長山城東十二里

臣駐紮

鄒平距長山三十里與賊甚近前因河防兵單所帶親軍

及平字兩營已派渡河協守隨身實無一兵楊飛熊一軍
先因賊已南竄於二十三日飭赴固山駐紮截勦西路甫
經到省二十六日接賊折竄東北之報卽飛調該軍兼程
折回向東攔截二十七日馳抵章邱臣以賊旣竄新城長
山若由淄川周村旁竄省垣路徑紛歧未敢調該軍前進
致賊乘閒逸出卽令駐紮章邱分路扼勦僅調該軍兩營
馳赴鄒平准備就近迎擊以待追兵二十八日該二營甫
到卽據探報賊之邊馬已竄過長山城西二三里臣卽飭
其整隊待敵並派令哨弁及馬勇共四十餘騎馳出鄒平
十餘里追逐邊馬以作聲勢詎該逆聞臣住鄒平又見馬
隊突出不敢西行連夜折回東路張店新城一帶臣正飭

楊飛熊進前兜勦時王正起王心安兩軍於二十八日已由金嶺鎮西抄出長山途遇馬賊數百追之卽遁劉銘傳各軍亦相繼追至賊見我兵均出其前卽向臨淄狂竄劉銘傳各軍商定以王正起等旣出長山由新城向西北兜截該軍卽分道由金嶺從東截直跟追該逆徑奔壽光劉銘傳及各軍馬隊追及截勦殺賊甚衆該逆向昌樂安邱連夜疾奔王心安營官副將宋延德帶馬隊二百餘騎乘夜截擊適遇馬賊數百宋延德奮力衝散殺賊數十名投誠者一百四十餘人臣令安爲安置現據探報仍竄向東南青口一路等語劉銘傳各軍仍行緊追王正起王心安兩軍臣飭令不必遠追仍照前議紮青州金嶺鎮預備回

竄楊飛熊一軍亦令回紮固山以防賊由南西竄黃河防
務冬至後連日驟然大寒深虞凍沍現在賊勢漸蹙運防
百數十營重重扼守黃防尤慮搶突

臣北念

畿疆焦灼倍至深恨饟需支絀無力增兵前於十一月查
看河道形勢後卽調集濱黃各州縣明定章程嚴施號令
勒限於十二月初十日前督勸民團將張秋至海口八百
五十里河牆一律築竣捐蓋窩棚以資憑守前據歷城縣
知縣陶紹緒稟報該縣應修七十八里已於初五日如式
工竣窩鋪均已蓋齊復倡捐錢五百千製造旗幟齊河縣
知縣聶慎典稟報該縣應修二百餘里亦已於二十七日
工竣其餘各州縣亦均稟報初七八等日可冀完工官民

極爲踴躍至駐防兵勇臣勉力湊集步隊一萬一千餘人
加以新到馬隊三千餘人自齊河以東起至海口止五百
七十五里定以每二十五里駐步隊一營共五百人每百
人分駐五里又每十里閒駐馬隊一哨共五十人無事操
練遇警則上下巡查又五里分駐兵勇百人恐難兼顧飭
令各州縣各按轄境每五里調民團三百名協助其水師
礮船八十餘隻令其分駐濰齊濟惠濱蒲利至海口九
處於上游多爲停泊遇有搶撲順水駛下始形捷利復令
於北岸修築礮臺百餘座如河冰凍結船不能駛卽將礮
移置岸上令水勇改爲陸隊藉資遠守臣猶恐河段過長
兵力太薄萬一凍結北岸難資抵禦復於河南岸飭令濱

河之齊東青城蒲臺利津高苑鄒平樂安博興八縣於黃水漫溢之處復築長牆一道約長三百餘里直抵海口一律捐造窩鋪若賊由南岸一帶竄撲有此一牆亦可扼守而北岸多一層屏蔽更覺可恃現據報不日亦可告竣其海口一帶四五十里一片荒灘萬難駐隊臣已飭令王成謙文彬等督同利津海豐各縣妥議辦理惟此次河牆辦理迅速恐未高厚兵勇亦恐疏懈臣於初十日由營赴利津至齊河親爲查驗用期嚴密至臣查畢後約在十二月二十四五日正屆大寒防務喫緊卽在此時現在東西扼勦南北布防勇團間紮設有警信各營及各州縣時多稟報臣偏駐一隅深虞間隔必擇一適中之地以便呼應靈

捷省城距河南岸僅十二里上下均可兼顧

臣

由齊河回

時擬暫移駐十餘日居中調度仰賴

聖主威福遠庇河防無事俟至立春凍開仍卽專力督勦
期於迅殄妖氛所有捻逆復被堵勦南竄及布置防勦並
查驗河牆各緣由謹恭摺馳奏伏乞

皇太后

皇上聖鑒訓示謹

奏

直梟狂竄擬由東南扼勦片

同治六年十二月初八日

再直境梟匪於二十二日竄至德州經黃兆昇督軍追勦斃賊十餘人該匪不敢暫停徑向恩縣清平一帶狂竄二十三日傳振邦飭派遊擊王壽朋齊登元由梁家淺拔隊跟追郭大勝由臨清繞截二十四日探知該匪又旁竄清水鎮復飭劉萬清由館陶截擊我軍馳抵清水該匪又向東南折竄二十五日郭大勝等軍追至冠縣之郎窩寨該匪又由雪店鎮折轉西南竄赴朝城張家樓復由該處竄入清豐二十六日我軍追至南樂探知賊又由梁村撲過河西回竄西北郭大勝等又復跟追二十九日該匪在太平莊攻圩郭大勝等帶隊趕至甫經接仗斃賊數名奪馬

八匹該匪又狂竄向直境之白菓新莊一帶逸去郭大勝等連夜窮追該匪又由杏園一帶竄赴棗強現在直軍均由西北分路追勦該匪經各路官軍晝夜追擊不能停喘逃散甚多各軍沿途多有搜殺並得賊馬數十匹勢甚窮蹙臣現飛咨傳振邦迅飭郭大勝等軍由東南扼勦與直軍兩面會擊冀殲窮寇謹附片具陳伏乞

聖鑒訓示謹

奏

殲除直梟摺

同治六年十二月十三日

奏爲直梟復竄東境經官軍晝夜追勦殲除殆盡現飭嚴搜逃匪以絕根株恭摺仰祈

聖鑒事竊

臣

於本月初八日將直匪東竄經直東官軍窮

追復竄棗強並飛飭東軍分路會勦各情附片具陳在案茲於初十一等日迭據東昌府知府龔易圖遊擊黃兆昇暨夏津等縣稟報該匪於本月初六日突由直境吳橋一路竄入山東德州境內向南狂奔約有馬賊二百餘人時外委張吉祥帶馬隊一哨駐紮德州當卽飛報駐紮恩縣之遊擊黃兆昇千總石魁陞等督隊迎勦一面帶隊緊撲南追該匪竄至恩縣甜水鋪以西適黃兆昇石魁陞帶

隊齊至該匪見官軍驟集向西南折竄黃兆昇等亦折回
跟追馳抵蒲河莊該匪回馬抗拒各隊開槍轟擊斃匪二
十二名奪獲賊馬十七匹該匪仍向西南敗竄石魁陞督
馬隊一百數十人緊躡其後黃兆昇步隊繼之時府經歷
朱雲欽亦帶隊趕至石魁陞馬隊追及於范家窰地方與
賊相持黃兆昇等步隊亦至合力圍擊槍礮齊施斃賊十
數名生擒執旗賊目張七周玉二名各勇乘勢奮殺又斃
賊二十餘人奪獲馬二十六匹旗幟器械三十餘件匪勢
散亂仍向西南死命狂竄各軍策隊疾追該匪見官軍追
急在於沿途逢人索換破布襖袴並以馬易贐意圖改裝
逃散各軍探蹤齊進在於蘇留莊地方將該匪圍襲斃賊

數人匪眾拚命突圍向松林內潰竄時將昏暮官軍一齊
踴入槍礮轟擊又斃匪三十餘名該匪多委棄馬匹逃竄
我軍乘勢緊追該匪連夜向夏津逃奔黃兆昇等亦晝夜
追逐時夏津縣知縣郝植恭聞被官軍窮追入境卽帶領
團勇乘夜迎前攔截時已五鼓行至該縣霍莊以北正將
賊路阻住我軍亦卽趕至兩路夾擊約斃賊二十餘名並
擒獲賊首蕭七一名餘匪二名奪獲馬二十餘匹器械多
件該匪黑夜亂竄我軍亦分路追殺又斃匪約二三十名
迨至天明四顧已無匪蹤各軍分路搜捕復獲郭九等三
名馬匹沿路遺棄窮搜竟日毫無匪迹計已殲除殆盡等
情臣查此股馬賊係由吳橋攔入德州其爲前股梟匪無

疑惟該匪是否係直軍勦敗全股東竄抑係分股竄入直境尙有餘匪亦未可知臣已飛行咨查第該匪以數百餘人在於直東兩省來往奔突剽悍異常遇馬隊則死鬪遇步隊則急走盤旋兩載有餘竟難殲滅茲復敗竄入東幸黃兆昇等踴躍赴機於賊入境後緊跟追勦遇賊卽擊不令暫停窮一晝夜之力竟將該匪殲除殆盡除去直東心腹之憂洵堪上慰

宸廑臣以該軍等係漏夜追殺昏黑之中恐有逃匿現飭龔易圖督飭各兵勇暨各州縣實力分路搜捕務期淨絕根株不准稍涉含混至此大追賊各員應給優獎以示鼓勵其餘在事防勦之文武員弁兵勇應俟臣查明該匪確

係一律肅清再行奏

聞仰懇

逾格鴻施准

臣

擇尤保獎用昭激勸所有直隸復竄東境

經官軍晝夜追勦殲除殆盡各緣由謹恭摺由驛具實奏聞再捻逆前已竄赴江境現接沂州府知府長廣稟據探報本月初五日該逆在吳山城頭等處焚掠距該府一百三十餘里該處係屬邳宿地方等語並據各路探報相同臣恐該匪復竄西路已飭楊飛熊一軍由章邱回紮固山以備迎勦合併附陳伏乞

皇太后

皇上聖鑒訓示謹

奏

查驗河牆事竣並據報逆首生擒摺

同治六年十二月二十三日

奏爲查驗河牆事竣暫駐省城並據報逆首生擒各情形恭摺仰祈

聖鑒事竊臣於本月初十日由鄒平親赴利津查勘黃防牆工卽由利津循厯上流河牆計至齊河五百七十餘里一律完竣由齊河上至張秋二百八十餘里亦已完工其齊東青城蒲臺利津高苑鄒平樂安博興八縣復於河南岸黃水漫溢之處添築長牆一道約長三百餘里工程均極堅厚此次黃河南北兩岸平地築牆共一千一百數十里不過二十日卽行就功又復沿牆搭蓋窩鋪均係民間自行捐辦此皆

國家厚澤深仁浹人肌髓故民情之踴躍如此也至在防
各營及各州縣民團協力駐守尙無疏懈直淮兩軍自齊
河防至張秋布置亦爲周密臣行抵齊東卽據探報捻逆
有竄越六塘河之信十九日查勘至濠口接據沂州府知
府長廣郟城縣知縣李漢稟報轉據統帶皖軍總兵程文
炳函稱捻逆竄過六塘河後剽疾異常由錢家集南豐都
城闖過運河刻已行抵皖境該軍已進至泗州其留住郟
城各營應全數調往一同進征等語正切疑慮並飛飭確
探稟報聞二十二日又接據濟甯州知州程繩武稟稱捻
逆馬數百匹逃竄仙女廟一帶將至揚州經華字營於十
五日將逆首賴汝洸生擒餘匪均降等語查覈情形江境

之賊似可藏事現在黃河防務除將東昌壽張營兵五百
餘名暫行遣回東昌以資彈壓外其餘各營各勇團仍暫
令如常駐紮俟確探賊蹤是否殲滅再行籌布現探聞張
總愚一股已竄吉州平陽一帶東昌臨清各屬均在河北
該逆亦甚剽疾亟須預防若南路軍務告竣北路卽當速
籌辦理臣現仍暫駐省城相機籌備一切所有臣查勘黃
防牆工事竣並據報賴逆生擒各緣由理合由六百里恭
摺馳奏伏乞

皇太后

皇上聖鑒訓示謹

奏

殄滅馬賊地方肅清片 同治六年十二月二十三日

再臣於本月十三日業將勦滅馬賊並嚴飭搜捕逃匪緣

由馳報在案拜摺後接據前直隸總督臣劉長佑來咨該

匪經直隸官軍勦敗人數不過二百名勢將東竄臣始知

直隸已無匪蹤嗣據東昌府知府龔易圖稟稱此股馬賊

由直隸東光縣境竄至恩縣境內時計約二百餘名經官

軍民團轉戰圍勦斬殺殆盡迨直隸余承恩等追軍至境

亦稱後路並無匪股惟官軍圍勦此賊係值深夜昏黑深

恐零星漏網星散潛匿各軍當卽分路搜捕適傳振邦所

派遊擊郭大勝亦於是夜馳赴夏津七里屯沿途搜殺散

匪十餘名奪馬十三匹各州縣亦均逐日下鄉嚴搜德州

知州趙新捕獲馬鎮等三名獲馬九匹恩縣知縣梅纘高捕獲張逢喜等六名獲馬五匹夏津縣知縣郝植恭督團捕獲六名又於前次陣前擒獲各匪訊出王六一名王天祐亦係匪首均經正法現在收獲馬共一百四十餘匹器械全行收取餘孽實已殄盡地方一律肅清臣復派員確查此股馬賊實已殄滅淨盡現復將所收馬匹調驗在事出力文武員弁臣於二十二日欽奉

諭旨查明地方肅清後准臣奏請獎勵容臣將在事防勦出力員弁勇團等確查明白再行奏懇

恩施不敢稍涉冒濫茲謹將捕斬逃匪地方肅清情形附片具陳伏乞

聖鑒訓示謹

奏

東境肅清西捻竄豫籌防進剿摺

同治六年十二月二十六日

奏爲東省全境肅清黃防省防次第裁撤並探悉捻逆竄抵豫疆現調各軍籌布河北勦辦事宜恭摺仰祈

聖鑒事竊

臣於本月二十三日將查驗河牆事竣暫駐省

城並據報逆首生擒各情馳陳在案竊以賴逆就擒江境無賊東省亦一律肅清所有省防河防自應全行調撤惟臣現接河南撫臣李鶴年咨稱張總愚股匪已由晉境攔入豫疆擾及衛懷一帶並據東昌府等處探報相同查河南懷慶衛輝與直省廣平大名壤地毗連距東昌屬之館陶冠縣暨臨清州不過五六百里東省邊防極爲緊要亟應預籌布置惟此時賊勢密邇

畿疆直省與晉豫交界各路均無險可扼現既擾及豫境將來非由廣平出臨洺關順德一路北竄必由大名廣平向館冠臨清各處東趨以此時籌辦情勢而論自以保衛畿疆爲重東省雖有邊防斷不能一意株守卽黃河爲南北天險刻下賊在晉豫黃河之險已失東省卽有河可恃亦無劃河爲界而置賊於北路之理將來勦辦機宜必須由北路繞向南截方爲合法臣現已調楊飛熊一軍由固山馳赴臨清暫行駐紮數日可到王正起一軍令其由青州取道省城前赴東昌暫行駐紮該軍相去稍遠約在正月初四五日可到東昌王心安一軍已調其由泰安取道前進惟該二軍追賊過久勇丁未免疲乏當令其酌爲刪

汰選補精壯用期得力又將東省各營零星馬兵馬勇湊足一千二百名歸王心安管帶與楊飛熊一軍互爲聯絡以便與賊馳逐各該軍到東昌臨清後應令覘賊所向如果竄近直東卽當出境迎勦至前防黃河之王成謙一軍臣調其由利津至省亦擬量爲汰選再行派出其吉林黑龍江各馬隊現在趕緊操練惟馬匹於本月初始行到齊以來路過遠廵力頗覺疲瘦當令養息數旬教練陣法乃能出隊臣本擬立即出省因庫項支絀不得不將各處防兵應撤應留就近在省城布置歸一擬於正月初旬卽親赴東昌查看賊情相機辦理所幸目前南路無警正可以全力專籌北面臣惟有竭力整頓以期勦辦有效所有東

卷一百一十五
三
境肅清撤調省黃兩防並調各軍籌布河北勦辦各緣由
謹恭摺由驛具奏伏乞

皇太后

皇上聖鑒訓示謹

奏

西捻漸向北竄督師進勦摺

同治七年正月初八日

奏爲據探西捻漸向北竄

臣出省馳抵東昌調集各軍擇

要布置並籌備援勦各情恭摺馳陳仰祈

聖鑒事竊

臣於上年十二月二十六日謹將探報西捻竄

豫並擬於正月初旬出省布防各情具報在案

臣連日在

省迅將南路各軍調集省垣親加整頓俱令分起馳赴東

臨要隘正在分布閒迭據東昌府知府龔易圖轉接直隸

大名府知府楊毓枬函報西捻各匪自竄到懷慶後日漸

北竄由修武新鄉擾及衛輝彰德一帶滑濬等處亦有土

匪時行聚散經豫軍勦擊本月初二日初三日賊股擾到

安陽湯陰一帶並有邊馬逼入磁州邯鄲武安臨漳各處

等情據此臣急於初四日由省起程初六日馳抵東昌伏查該匪自晉入豫日漸竄向東北豫陝各軍俱皆緊蹙追擊誠慮乘虛竄入直疆則東省之東昌臨清各屬均皆喫重抑臣更有慮者此次賊蹤全在西北辦理情形固急於勦而不急於防尤急於攔勦而不可急於尾追該匪已到懷慶之東越河出山無險可扼直境之大順廣俱係一坦平行現在若僅令東軍扼守邊圉臨邱莘觀各置一軍頗可自固但恐該匪再由磁州邯鄲偏東向北直竄則東越大名北突順德直達正定在在均入腹地重爲

畿輔之警東省與

畿疆最近雖宜自固邊圉尤宜選集大枝之軍籌備北援

以資緩急現查東省與直壤毗連之境則館冠與大名相依臨清與廣平相依均宜飭軍駐紮而與

京師相近之處則德州最爲要隘臣現飭副將王正起帶

振字營五千人已於初五日馳抵館陶擇要扼駐以顧館

冠南路飭總兵楊飛熊帶吉勝營四千五百人於初七日

自東昌馳赴臨清擇要駐紮以顧臨邱北路並調黑龍江

吉林馬隊分駐臨東與步隊相合嚴行訓練臣另將各營

嚴加選擇挑集十一營交副將莫組紳統帶卽日馳赴德

州駐紮約計初十日內外陸續可到再將已革總兵王心

安所帶東治五營合併莫組紳所部共成八千步隊又將

各起零星馬隊調集一千人亦交王心安統帶併駐德州

以爲籌備北援之旅如該匪竟從大名東路入犯則三路之軍均令由北向南迎擊冀可蹙之黃運之交一加痛剿儻該匪竟越順廣北竄直犯

畿輔則擬飭楊飛熊王正起兩軍留駐東境以備回剿臣卽馳赴德州親督莫祖紳王心安馬步各軍北上由景州河間任邱雄縣向東北駛進冀可趕出賊前攔頭迎擊以期會合

畿輔防軍遏其北犯上紓

宵旰之憂至此軍行糧需用臣亦擬設法預爲籌挪期可及時應用臣現仍暫駐東昌兼籌防勦日發偵探妥爲調度一面飛函直隸督臣官文暨陝甘督臣左宗棠察看軍

情互相知照商度籌辦總期臨機應變竭盡心力所及力籌布置用以仰答

鴻慈除將偵探賊情暨防勦情形再行隨時馳報外所有微臣出省督飭防勦分軍布置暨籌備北援各情是否有當理合恭摺由六百里馳陳伏乞

皇太后

皇上聖鑒訓示祇遵謹

奏

捻竄順德督軍援勦並籌東省邊防摺

同治七年正月十一日

奏爲捻蹤北竄已過順德

畿輔情形喫重現擬親督各軍援勦並籌備東省邊境各情形恭摺仰祈

聖鑒事竊臣於本月初八日謹將西捻北竄並出省籌辦分軍布置援勦各情馳陳在案臣初以賊竄磁邯距廣平甚近廣平與東省臨清相去不過二百數十里竊意賊尙未竄入擬令王正起一軍先由館陶進至廣平繞出北面兜擊逼賊南趨再行設法勦辦甫經飭行去後於初十日已刻接據廣平各路探報該逆已由永年縣北竄入順德府之南和平鄉一帶復竄過新河境內後路張曜朱慶及

左宗棠所派各軍均各跟追等語查賊蹤已過新河若由冀州衡水武邑東光等處東竄北路情形較鬆尙無可慮若直由甯晉趙州欒城一帶徑奔正定則北面地勢平曠無險可扼卽有滹沱河水之阻而冬令水枯策馬可涉亦不足恃此時

畿輔情形極爲喫重且追師甚厚前路攔截之兵直隸督臣官文必能布置惟恐北路一片平原勢難分布臣接報之下不勝焦急因卽日啟行兼程前赴德州計十二日到幸王心安馬步各營適到東昌臣卽帶其北行其前派往德州之莫組紳各營計十一日亦可到齊臣擬於到德州後趕緊籌備行資定於十三日親督各軍由景州河間

向北倍道前進彼時該逆若東竄冀衡武東各處自可迎頭痛勦若徑北趨正定一帶臣軍或由任邱雄縣一路會合直省各軍由

京門向南攔截或由肅甯蠡博一路橫出攔勦均俟臨時視賊所向相機辦理總以力遏北犯

畿輔爲要至東省邊境臣仍飭令楊飛熊王正起兩軍分駐臨館兩處儻能將該逆攔擊回竄東疆該兩軍卽可迎頭勦擊且臨清一路可顧德州館陶一路可顧莘觀東邊不致疏虞臣職司守土出境殊覺未便惟

畿輔重地若僅令各軍自行赴勦深恐機宜未協貽誤堪虞臣是以親督前進以期無誤事機至出境後臣惟有親

督各軍盡力攔剿冀可稍紓

宸廑所有捻蹤竄過順德

臣

督各軍出境攔截援剿緣由

謹恭摺由驛馳陳伏乞

皇太后

皇上聖鑒訓示謹

奏

督師行過河間繞北截勦摺

同治七年正月十五日

奏爲督師北援行過河間前隊已馳及任邱現擬到雄縣繞出北面截勦以顧

京門恭摺仰祈

聖鑒事竊

臣

於十一日謹將西捻竄過順德兼程馳由德

州督兵向景州一路北援各情馳陳在案

臣

十二日抵德

州後卽飭令各兵勇將帳房一切全行遺寄各帶五日行糧於十三日由德起行是日抵景州接據探報捻逆已渡過滹沱河北駛

臣

聞信之下遙念

京門極爲喫重心急如焚當督飭王心安莫組紳等迅催各營兼程疾趨十五日行過河間前隊已馳及任邱計十

六日可至雄縣查雄縣爲進

京東西大道總路東由固安黃村計程僅二百四十里西由新城涿州良鄉計程亦祇二百八十里現在賊蹤飄忽靡定臣擬明日到雄縣後察看賊情如已竄過保定卽督軍兼程由固安至黃村一路折向西南出蘆溝橋良鄉一帶迎頭兜勦如賊尙未到保定卽督軍由雄縣橫出涿州向保定安肅一帶會合各路防軍迎截總以偏出東北後再折向南勦不落賊後以期屏蔽

京畿至臣軍已到雄縣距

京師東西均不過二百數十里兼程二日卽至臣出境後復飛飭楊飛熊一軍由臨清進紮河間以備該逆被擊南

奔爲迎頭截勦之計至東省邊境臣已飭王正起一軍由館陶移紮臨清北至德州南至館陶均可兼顧並勒令各州縣督飭民團趕築土圩堅壁清野准備該逆東竄無所得食將來官軍可收追勦之效所有微臣督師出境已抵河閒任邱並擬繞出北面相機迎勦各緣由謹恭摺馳陳伏乞

皇太后

皇上聖鑒謹

奏

督師行抵雄縣籲懇陛

見片

同治七年正月十五日

再

臣

師抵雄縣距

京師僅二百數十里若須繞北南趨相距尤近

天顏咫尺依戀彌深且當勦捻喫緊必須請

示機宜以免隕越合無仰懇

天恩准

臣

來京叩

見俾稍伸犬馬之忱並得跪聆

聖訓以後一切勦辦事宜得所遵循庶無貽誤如蒙

俯允

臣

俟奉到

批摺後一面馳派王心安莫組紳先行帶隊迎勦

臣

一面

馳赴

關廷計往返不過三四日即可回營謹恭摺附陳伏乞
聖鑒訓示謹

奏

捻蹤折向南竄督軍回勦兼顧東境摺

同治七年正月十八日

奏爲捻蹤折回南竄北路情形較鬆現督各軍由東北向南探蹤回勦並籌顧東境恭摺仰祈

聖鑒事竊

臣

於十五日謹將

臣

軍已過河閒疾趨雄縣探

賊迎勦情形馳奏在案十六日已刻在任邱途次欽奉

諭旨捻騎剽疾異常丁寶楨已由河閒雄縣旁趨捷徑迅

赴固安等因欽此

臣

卽日催督各軍均抵雄縣十七日兼

程一百三十里行抵固安連日接據探報均稱賊在保定

之西大汲店一帶盤踞月股已擾及易州等語據固安雄

縣探稟相同

臣

以賊趨易州

陵寢重地關係匪輕十七日抵固安後卽傳令莫組紳王

心安等定於十七日疾趨涿州涑水先辦易州之賊再行會勦保定一股布置定後於亥刻接准直隸督臣官文飛函知照賊知北路重兵厚集向南移竄探報已至博野安平各境擬卽出省督軍扼要追勦等語查賊南竄博安距保定已百餘里北路情形較鬆博安等縣東卽涑州衡水武邑棗強西卽晉州鉅鹿廣宗威縣與東境之臨邱館恩武夏各州縣一片毗連急應回顧且涑州東竄尤防其擾及天津北面仍形喫緊臣現已飭王心安宋延德帶隊卽日折回雄縣仍由河間一路由東北向西南探賊追勦兼顧北路臣亦卽親督莫組紳等繼進至東省邊境刻下賊勢南趨亦極緊要楊飛熊一軍臣初飭其由臨清進駐河

間以爲臣後路接應兼顧德州恩縣門戶日內曾否已到
河間尙未接該鎮稟報臣刻已飛飭其移紮景州如賊竄
衡武棗清等處令其與之馳逐屏護東境不隹株守如賊
旁竄東境卽可相機迎勦王正起一軍臣令其駐紮臨清
亦可與楊飛熊聯絡會合臣抵河間後如官文已進駐該
處當與之面商一切機宜總期將該逆向南堵勦以紓
宵旰之憂所有賊蹤折向南竄臣督軍回勦並籌備東境
各緣由謹恭摺馳奏伏乞

皇太后

皇上聖鑒訓示謹

奏